

Nan perseverancia a duna resultado

Trayecto Formacion Social a duna certificado na 12 hoben



Riba combinacion di potretnan por aprecia mas di e entregamento di diploma di e hobennan di e proyecto Formacion Social.



ORANJESTAD- Un otro grupo di hoben di e programa Formacion Social a termina e trayecto exitosamente. Durante un ceremonia den Fort Zoutman e hobennan aki, cu a haya un segundo oportunidad den bida, a haya nan certificado for di man di Prome Minister Mike Eman y lider di e proyecto sra. Jessy Ras. Eman ta e persona cu a inicia e tremendo proyecto aki. Cu ayudo di Hulanda a pone e trayecto den otro. Marinierskazerne ta hunga un rol esencial den henter e proceso aki. Esaki ta e di dos grupo cu ta caba e programa exitosamente. E hobennan ta cla pa subi mercado laboral.

PASENSHI Y GUIA

Den presencia di Prome Minister di Aruba Mike Eman, Parlamentarionan, representantenan di VNO, di Marin-

ierskazerne, docentenan di 'Enseñansa pa Empleo', lider di e proyecto sra. Jessy Ras, mayornan, famia, amigo y conocinan, e hobennan orguyoso tabata scucha e discursonan cu tabata dirigi na nan. Nan tabata e centro di atencion e diabierna atardi aki. Capitan Werleman, un persona cu hopi pasenshi y cu a guia e hobennan den nan prome 4 luna di e trayecto na kazerne, tabata breve den su discurso. "Boso ta esnan cu ta dicidi si boso kier bay dilanti. Disciplina ta importante. Boso a siña hopi disciplina. Nunca lubida esey. Awor cu boso ta cla pa sigui den bida mi kier a duna boso algun bon conseho. Corda pa boso semper ta na ora na trabou. Cumpli cu boso trabou y semper mantene respet pa otro. Keda firme para den boso sapato y boso ta yega leu. Esey ta meta di e trayecto aki tambe".

PROYECTO SOSTENI DOOR DI HULANDA

Prome Minister Mike Eman, kende ta e motor fuerte tras di e proyecto Formacion Social a hiba un bunita discurso. El a cuminsa na bisa cu e programa ta wordo sosteni pa gran parti dor di Hulanda. "Sr. van der Wulp ta e representante di Reino Hulandes na Aruba y mi kier a enfatisa cu sin e cooperacion di Hulanda e programa aki lo no tabata posibel. Tanto riba tere- no financiero – e gastonan ta wordo reparti – como tambe y principalmente e disponibi-

lidad di Marina Hulandes na Aruba cu riba nos peticion a yuda cu training di e hobennan di Formacion Social".

Den nomber di comunidad di Aruba y di e hobennan cu a y ta forma parti di e trayecto Formacion Social, Prome Minister Eman a gradici sr. van der Wulp pa e cooperacion positivo di Hulanda. Eman a sigui bisa cu esaki ta un otro momento di hopi satisfaccion. "Nos cu ta dirigi e pais aki por tin pensamiento y deseonan, mescos cu tur otro envolvi den e proyecto aki manera Marina y Enseñansa pa Empleo, pero na final ta e curashi di e hobennan, cu nan mes ta dicidi cu nan kier cambia e direccion di nan bida, cu nan a pone e trayecto aki como un prioridad, ta loke a conduci na a resultado di awe. Nan amor pa nan mayornan, nan wela, famia y prohimo, ta loke a pone nan tuma e decision pa participa na e trayecto aki".

PROME PASO RIBA CAMINDA DI BIDA

Prome Minister a desea e hobennan exito den nan bida y nan carera profesional. Despues a sigui entrega di certificado. Humberto Schmidt ta e miho graduado. Un hoben simpatico cu kier sigui dilanti. E prome paso ta tuma riba e caminda di bida. Mescos cu mayoria di su compañoeronan, e tin un trabou ta ward'e y di eynan e kier sigui desaroya su mes. Pabien ta tur e hobennan cu a caba e trayecto. □